

# PEDRO REMBICUACHIA YIPINDAR VAHE SAN PEDRO

---

**Pedro mahenduhasa Jesús reroyasar  
opacatu rupi oñemosai vahe upe**

**1** <sup>1</sup>Che, Pedro, Jesucristo apóstol aicuachía co che ñehe pëu, pe Tüpa rembiporavo pe recua pipe sui peñemosai vahe ivi Ponto, Galacia, Capadocia, Asia iyavei Bitinia rupi peico vahe upe. <sup>2</sup>Supi eté pe yande Ru Tüpa rembiporavo yipisuive peico semimbotar rupi. Evocoyase oEspíritu Santo pipe pe peha oyeupe nara viroyasar pe reco água ‘imoatiroprí toyuvirecoi che Rahir ruvi pipe oangaipagüer sui’ oya. Peipisi catu Tüpa porovasasa pe reco tupri água.

**Tüpa suindar mbahe aviye vahe rãrosa**

<sup>3</sup>iImboeteipri tasecoi Tüpa, yande Yar Jesucristo Ru! Ahe niha oporoparaisuerecosa pipe yande recocuer mbopiasu. Ëgüe ehi yandeu Guahir Jesucristo ocuerayevisa. Ipipe sui yaicuaño ité oimera mbahe aviye vahe Tüpa suindar yandeu. <sup>4</sup>Ipipe sui avei Tüpa oipisi ucara pëu pe mombaheisa ivave yapocatupri nocañii vaherã, ndituyui vaherã iyavei ndopai vaherã ité. <sup>5</sup>Pe peyeroya ité Tüpa rese. Sese niha ahe opĩratasa pipe pe repi mbahe tẽi sui poropĩsirosa pe reco água. Ahe vireco vahe imoingatupri ari ipa vahe mboyecua água pëu.

<sup>6</sup>Co rese peyembovihareteño peico, yepe cūrítei pe reco pipe peparaisu pucu raimi tẽi setá pe recoãhasa pipe peico viña.

<sup>7</sup>Esepia, pe yeroyasa Tūpa rese aviye oro, ahe sãhasa tata pipe yepi. Ëgüie ehi aveira pe recocuer sãhambri tata nungar mbahe yavai vahe pipe, “¿Aviye vahe ité pïha?” hesave. Yañemosase evocoi mbahe yavai vahe upe, ahese yande yeroyasa aviye catura oro ocañi tẽi vaheřã sui. Ëgüie yahese, “Che rese pe yeroyasa aviye ité” ehira yande Yar yandeu. Ahese yarecora teco porañetesa iyavei imboeteipri yaicora acoi Jesucristo oyevise curi.

<sup>8</sup>Pe niha pesaisu yande Yar Jesucristo, yepe ndapesepiai viña; cūritei rumo sepiaēhi pipe peyeroya sese. Sese pereco ité pe viharetesa tuvichá, aviye catu vahe, ndapeicatui vahe ahe imombehu. <sup>9</sup>Esepia niha, pesupiti pe remiaro poropĩsirosa apirēhi vahe peico pe yeroyasa pipe.

<sup>10</sup>Aracahe suive ava Tūpa ñehe mombehusar oicua tupri pota ité co poropĩsirosa resendar yuvireco ‘¿mara ehi eté pïha co tecocuer?’ oyapave yuvireco. Iyavei oñemoñeta yuvireco Tūpa oporoaisusa pipe pẽu mbahe ombou vaheřã rese. <sup>11</sup>Cristo Espĩritu senondeve oicua uca mbahe Tūpa ñehe mombehusar upe aipo ehi: “Poropĩsirosar oyemombaraisu ranera, ipare rumo teco orisa porañete vahe oimera” ehi chupe aracahe. Sese, “¿Umara pïha evocoi mbia?” ehi; “¿Mbahesera vo oimera co Espĩritu remimombehu yandeu?” ehi yuvireco. <sup>12</sup>Tūpa rumo omboyecua chupe, ndahei chupe nara ité imombehupri yuvireco, pẽu nara ité rumo. Ahe avei niha poropĩsirosa resendar ñehesa mombehusar omombehu pẽu cūritei, Espĩritu Santo pĩratasa pipe imboupri iva pendar yandeu. ¡Tūpa rembiguai avei oicua tupri pota tẽi cūritei yuvireco viña!

### **Tūpa yande poravo yande reco maranehi ãgua**

<sup>13</sup>Sese pe pihañemoñeta tuprisa pipe pemahemoha tuprira peyese Tūpa porovasasa pẽu ombou vaheřã rese pe yeroya catu ãgua acoi Jesucristo oyevise curi. <sup>14</sup>Tahir iporeroya vahe pe recosa pipe ndapeicoi chira mbahe pe remimbotarai pipe, acoi pereco vahecuer peyese Tūpa recocuer cuaēhi viteseve. <sup>15</sup>Peicora rumo pe reco maranehisa pipe ité. Esepia, Tūpa pe poravo oyeupe nara; ahe ndaseco marai vahe ité. <sup>16</sup>Supi eté icuachiapri aracahendar pipe aipo ehi imombehu: “Pe tapeico seco maranehi vahe. Esepia, che ndaseco marai vahe aico” ehi.

<sup>17</sup>Tūpa niha opacatu ava upe secocuer rese nomboyoviratĩi chira oporandu curi, sese pe, “Che Ru” peye vahe chupe

peyembosiquiyera mbahe tēi apoēhi āgua imboeteisave co ivi pipe peico vitese. <sup>18</sup>Esepia, Tūpa pe pīsiro aracahendar pe ramo suindar aracuasa ēgüe ehi tēi vahe sui. Peicua tupri ité niha co poropīsirosa repri nimboepisai eté que mbahe ocañi tēi vaherā pipe inungar oro, anise guarepochira viña. <sup>19</sup>Imboepisa rumo Cristo ruvi maranehi pipe. Ahe seropovēhepri, inungar ovesa nimarai vahe. <sup>20</sup>Ahe Tūpa oiporavo aracahe ivi, iva apoēhi viteseve ēgüe ehi vaherā. Cūrítei rumo oyemboyecua pēu mbahe tupri āgua. <sup>21</sup>Secocuer sui niha peroya Tūpa peico, ahe ombogüerayevi vahe omano vahe pāhu sui, ipare omondo oyemboeteisa, güeco porañetesa avei chupe. Ipipe sui peyeroya Tūpa rese iyavei pesāro co mbahe aviye vahe pisi āgua ichui.

<sup>22</sup>Cūrítei Tūpa Ñehengagüer supi tupri vahe mboyeroyasa pipe imoatirosa pe recocuer pesaisu vaherā ambuae Jesús reroyasareta. Evocoyase ēgüe peyera peyeaisu catu opacatu pe pihañemoñeta tuprisa pipe, iyavei opacatu pe pīratasa pipe. <sup>23</sup>Pe niha pereco tecovesa piasu, ndahei pe yesupa omano tēi vahe suindar. Ahe rumo Tūpa Ñehengagüer supi tupri apirēhi vahe reroya pipe. <sup>24</sup>Esepia, icuachiapri aracahendar pipe aipo ehi:

“Opacatu ava inungar caha, iyemboeteisa evocoyase inungar ipotri.

Ipare ahe caha opa omano, ipotri avei opa oviapi;

<sup>25</sup>Tūpa Ñehengagüer rumo apirēhi vaherā ité yepi” ehi. Ahe co ñehesa imombehupri poropīsirosa resendar pēu nara.

**2** <sup>1</sup>Sese peseya opacatu mbahe naporai vahe; opacatu porombopasa tēi, pe reco tupri angahu tēisa, ambuae ava mbahe pota raisa, iyavei opacatu mahechiroi resendar. <sup>2</sup>Inungar pītanimi ocuacua āgua oipota cambi; ēgüe peye aveira pe querēhisa pipe Tūpa Ñehengagüer rese pe yembohe catu iri āgua, peico tupri āgua poropīsirosa pipe, <sup>3</sup>que peicua itese yande Yar reco aviyesa.

### Cristo inungar ita ndopai vahe

<sup>4</sup>Peyemboya catu yande Yar rese. Ahe inungar ita ndopai vahe. Ava rumo oviroiroño yuvireco. Tūpa rumo ahe ita oiporavo aviye catu vahe. <sup>5</sup>Ēgüe ehira pe rereco oyeupe inungar ita ndopai vahe; ipipe sui omopuhara otūparoguã pe rese. Iyavei pahi ndaseco marai vahe nungar peicora semimbotar rupi chupe. Pe evocoyase

Jesucristo rembiapo pipe sui peyapora Espíritu upendar mbahe aviye vahe. Ahe inungar mbahe seropovêhepri aviye vahe Tûpa upe. <sup>6</sup>Esepia, icuachiapri aracahendar pipe aipo ehi:

“Che amondo ñepepe ita nungar ava aviye vahe tecua Sión ve imoviracua ãgua.

Ahe che rembiporavo iporañete vahe, imboeteipri.

Acoi oyeroyá vahe sese, ahe nochĩ chietera ichui” ehi.

<sup>7</sup>Pe seroyasar peico vahe upe evocoi ita aviye vahe ité.

Seroyasarêhi upe rumo imboaviyesa co ñehesa aipo ehi vahe:

“Oĩ aposar rumo viroĩroño co ita yuvireco.

Ahe ita rumo coiye vĩracuasa aviye catu vahe”

ehi. <sup>8</sup>Iyavei omboaviye aipo ñehesa:

“Co ita oipihapi oiti uca ava” ehi. Esepia, Tûpa suindar ñehesa reroyaêhi pipe sui oyemondo uca mbahe tẽi pipe yuvireco. Êgüe ehi vaherã ité rumo ahe secocuer yuvireco.

<sup>9</sup>Pe rumo ava oyesuindar nungar iporavopri peico Tûpa uve nara, imborerecuasa upendar pahi, iyavei chupendar ava seco marañehi vahe peico. Êgüe peye Tûpa reco pĩratasa mombehu ãgua peico. Esepia, ahe pe renose pĩtumimbisa nungar pe recocuerai sui tesapesa aviye vahe pipe pe reique ãgua. <sup>10</sup>Yipĩndar ndahe vıteı eté Tûpa upendar ava peico, cũriteı rumo ahe ité peico; yipĩndar ndaperecoı Tûpa poroparaisuerecosa, cũriteı rumo pereco ité cute.

### Peico catu Tûpa mboeteı ãgua

<sup>11</sup>Che rivıreta, che rembiaısu, peico raimi tẽi vahe co ivı pipe, pepoi opacatu co ivı pipendar pe pıhañemoñeta raisa sui. Esepia, pemomara uca tẽi pe recocuer ipipe. <sup>12</sup>Pereco tupri pe recocuer aviye vahe ava Tûpa ndoıcuı vıteı vahe rovaque. Yepe ava remıeroıro peico inungar-ra mbahe tẽi aposar viña, osepiase rumo pe rembiapo catupri, omboeteıra Tûpa yuvireco ahe ari pipe acoi yande Yar oporanduse opacatu ava recocuer rese curı.

<sup>13</sup>Yande Yar raisusa pipe pemboyeroıa opacatu pe rerecuar co ivı pipe: que mborerecuar guasu ivate catu vahe, <sup>14</sup>anise yıvirındar. Ahe pe recua pipendar rãrosar imondopri ava naporai vahe mombaraisu ãgua, iyavei ava seco catupri vahe upe, “Avıye nde recocuer” he ãgua. <sup>15</sup>Esepia, Tûpa oıpota pe peyapora mbahe aviye vahe ava mbahe ndoıcuı vahe upe, ndayaracuı vahe upe pe rese iñehe-ñehe tẽiêhi ãgua.

16 Peico tupri ava rovaque mbiguai tēi nungar sui senosepri pe recosa pipe. Ndiyai rumo ipipe peyapo iri mbahe tēi. Peico tupri rumo Tūpa rembiguai pe recosa pipe. 17 Pemboeteira opacatu ava. Pesaisu catu pe rivireta Jesús reroyasar; pemboetei Tūpa; pemboyeroa avei mborerecuar guasu.

### **Yembohesa yande Yar Jesucristo mombaraisu agüer resendar**

18 Pe, ava rembiguai, pemboyeroa catu pe rerecuar imboeteisa pipe que seco catupri vahe, que ndaseco pōrai vahe avei. 19 Esepia, aviye catu yañemosase mbahe-mbahe tēi ava rembiapo upe Tūpa mboyeroa tupri pipe. 20 Mbahe tēi aposa pipe rumo pe mombaraisuse yuvireco, ndipoi eté evocoyase ichui mbahe aviye vahe peñemosase evocoi nungar mbahe upe. Co rumo acoi mbahe tupri aposa pipe pe mombaraisuse yuvireco, ipare peñemosase chupe, ahe rumo aviye catu itera Tūpa upe. 21 Pe paraisu āgua rese niha Tūpa pe poravo. Esepia, Cristo oyemombaraisu pe recocuer rese. Ahe rane ēgüe ehi pe rese pe secocuer moña āgua. 22 Ahe ndoyapoi vahe ité angaipa iyavei ndoporombopai vahe ité. 23 Acoi ava iñehe mara-mara tēise yuvireco chupe, nomboyevii eté iñehe raisa. Iyavei acoi omombaraisuse yuvireco, “Ayepira sese” ndehi eté. Ahe rumo, “Che Ru Tūpa seco ñvi vahe oicuara chupe yuvireco” ehiño oyeupe mbahe-mbahe tēi aposar upe. 24 Cristo teieté viraso yande angaipagüer güete pipe curusu rese ‘toyepipi angaipa sui yuvireco. Ipipe sui toyuvirecoi teco ñvisave’ oyapave yandeu. Ahe niha yapichapri secoi pe recocuer moingatu āgua. 25 Esepia, pe niha yipindar inungar ovesa ocañi tēi vahe peico viña. Cūrítei rumo peyevi Cristo upe. Ahe pe recocuer osāro cūrítei inungar ovesa rārosar.

### **¿Mara ehira ava omenda vahe recocuer yuvireco?**

**3** 1-2 Ëgüe peye aveira cuña, pemboyeroa itera pe mer. Esepia, amove ndoviroya vitei Tūpa Ñhengagüer yuvireco; pemboyecuase rumo pe reco tupri imboeteisa avei chupe, avieteramo ahe avei viroyara, yepe ndapeñehei chira chupe viña. 3 Acoi pemboyecua potase pe yemoporañetesa ndahei chira pe rete rese inungar oāca rese mbahe omoporañete ai vahe, ndahei chiaveira pe ymondesa sendi yai vahe oro nungar, que turucuar porañete catu vahe. 4 Iya rumo pe aviter pipe sui mbahe porañete ipocopi vahe

peboyecua pe reco mbegüemisa iyavei pe recoasiêhisa pipe. Evocoi nungar aviye catu ité Tûpa rovaque. <sup>5</sup>Ëgüe ehi avei cuña seco catupri vahe güeco porañetesa imboyecua aracahe. Ahe oyeroya Tûpa rese yuvireco, omer avei omboyeroya yuvireco. <sup>6</sup>Inungar Sara aracahe, omboyeroya ité omer Abraham, “Che yar” ehi chupe. Pe inungar ichuindar peico peyapose mbahe aviye vahe pe siquiyeêhisa pipe.

<sup>7</sup>Iyavei pe imer, pereco mbegüera pe rebireco upe.

Pemboeteira sereco. Esepia, ahe nipirata tuprii, iyavei Tûpa omboura güeco tuprisa pipe tecovesa apirêhi vahe oyoya voi pëu. Ëgüe peyese, Tûpa osendu itera pe yeruresa.

### Paraisusa mbahe tupri aposa rese

<sup>8</sup>Iyavei na peyera pe opacatu peyese inungar ñepeï oñemu vahe. Oyoya tupri mbahe tapeyandu. Peyeaisu catura Jesús reroyasar pe recosa pipe. Peyemboavara oyeupe pe reco mbegüesa pipe. <sup>9</sup>Oyapose ava que mbahe têi pëu, anise que oñehe raise, ndapemboyevii chira chupe. Iyacatu rumo mbahe tuprisa pipe pemboyevira chupe. Evocoi nungar mbahe apo âgua niha Tûpa pe poravo ‘toipisi che porovasasa’ oyapave. <sup>10</sup>Esepia,

“Peipotase pe recocuer aviye tupri âgua pe yemboviharetisa pipe, pemombituhu pe ñehe raisa iyavei ndapeporombopai chira.

<sup>11</sup>Pepoi aveira mbahe têi sui, pesecara mbahe aviye vahe.

Peseca teco tuprisa peyeupe nara, peguata supi.

<sup>12</sup>Esepia, supi eté, yande Yar osâro ava seco catupri vahe iyavei osendu oyeupe yeruresa.

Ava mbahe têi aposar rumo ndoipisii eté” ehi.

<sup>13</sup>Ndipoi chira revo que ava mbahe têi oyapo vahe pe recocuer upe yuvireco, pequerêhise mbahe aviye vahe apo. <sup>14</sup>Peparaisuse rumo mbahe pe rembiapo aviye vahesa rese, isovasapri peico! Peyembosiquiyei rene que ava sui. <sup>15</sup>Pemboeteiñora rumo Cristo pe Yar secosa rese pe piha pipe. Peyemoingatu vaira ava pe remiaro rese oporanduse pëu pe querêhisa pipe imombehu tupri âgua.

<sup>16</sup>Ëgüe peyera rumo pe reco mbegüesa pipe imboeteisave. Peico tuprira pe pihanemoñeta tupri rereco. Acoi que oñehe rai vahe pe Cristo reroyasa recocuer rese, ahe yuvinochira oñehe sui curi.

<sup>17</sup>Tûpa oipotase pe yemombaraisu, aviye catu mbahe aviye vahe apo pipe yepi mbahe têi apo rãgüer sui. <sup>18</sup>Esepia niha,

Cristo teieté omano yande angaipa repirã ñepei reseve. Güeco maranehi pipe êgüe ehi ava recocuerai rese opacatu pe reraso ãgua Vu Tûpa upe. Ahe omano güete rese. Ipare rumo ocuerayevi güeco espíritu pipe. <sup>19</sup>Güeco espíritu pipe avei oso, omombehu Vu Tûpa remimbotar ava hã soquendapri yuvirecoi vahe upe. <sup>20</sup>Ahe ava Noé recosendar ndiporeroyai vahe yuvireco aracahe. Tûpa osãro güeco mbegüesa pipe secocuer moingatu ãgua viña Noé oyapo viteseve arca oico. Ahe ipipe oñepisiro ochomi tẽi yuvireco amarusu sui. <sup>21</sup>Ahe i osãhangapo i poroãpiramosa, ahe omboyecua yande ipĩsiropri yande recosa. Poroãpiramosa rumo i pipe ndahei yande rete moatiro ãgua. Co rumo yaporandura Tûpa upe, yande pihañemoñetasa moatiro ãgua. Ipipe sui evocoyase yañepisirora yande Yar Jesucristo cuerayevisa pipe. <sup>22</sup>Ahe oso ivave oguapi oĩ Vu acato coti. Opacatu sembiguai eta, mborerecuareta, opacatu imborerecuasa ipĩrata vahe avei ipovri pendar yuvirecoi.

**Yandehañeco yandeyese mbahecuasa  
Tûpa suindar yaipisi vahe pipe**

**4** <sup>1</sup>Cristo oiporara mbahe rasicuer güete rese. Pe avei evocoyase peyemoingatu voi êgüe peye vahe rã peico chupe nara. Esepia, acoi ava oyemomborara vahe güete pipe oseyá angaipa yuvireco. <sup>2</sup>Ipipe sui ndoyuvireco iri chira ari rupi ava tẽi pihañemoñetasa pipe. Tûpa remimbotar rupi eté rumo oyapo pota mbahe co ivi pipe yuvirecoi vitesé. <sup>3</sup>Êgüe peye pucu rane niha pe rembiapo ai pipe peico ava Tûpa reroyasarẽhi recocuer nungar rupi tupri. Ahese mbahe-mbahe tẽi peyapo pe pihañemoñeta raisa pipe, savaiposa, pietasave pe rãse tẽi pipe pe aracuasa pemocañi pe ihu tẽisa pipe, pemboetei avei mbahe rahanga tẽi peico. <sup>4</sup>Cũritei rumo pe mboriparer, ndoyembovihai tẽi pe rese, ndapeico irise supi semimbotarai apo ãgua. Ahe oñehe-ñehe tẽi yuvireco pe recocuer piasu rese. <sup>5</sup>Ahe chupe rumo oimera porandusa. Esepia, yande Yar oyemoingatu opacatu ava recocuer rese oporandu ãgua omano vahe upe, oicove vite vahe upe avei curi. <sup>6</sup>Sese niha co ñehesa piñsirosa resendar imombehusa ava omano vahe upe. Yepe omano co ivi pipe inungar opacatu ambuae ava oangaipa repirã, iespíritu rumo yuvirecoi apirẽhi inungar Tûpa.

<sup>7</sup>Virovi rumo ari ipa vahe oico, sese pe yapisacasa pipe pepihañemoñeta tupri iyavei peyerure catuño ité pe yeroya tupri

pipe. <sup>8</sup>Co catu opacatu tupri ité peyeaisura pe piha pipe. Esepia, ãgüe yahera poroaisusa pipe yande ñero voira seta ava yangaipa vahe upe. <sup>9</sup>Peipisi tupri ava yuviraso vahe pe rêtave; “¿Mbahe rese piha co ou?” peyei rene pe pihañemoñeta pipe pe piri ou vahe upe. <sup>10</sup>Ñepei-peí yande yaiporura Tûpa suindar mbahecuasa yareco vahe ambuae Jesús reroyasar rese hañeco tupri ãgua. Yaiporu tuprira co Tûpa porovasasa setá vahe yande cuaita mboaviye tupri ãgua. <sup>11</sup>Acoi pemombehuse Tûpa suindar mbahe, pemombehura inungar iñehe ité; acoi peporopñitivii potase, peyapoño opñratasa pñu Tûpa ombou vahe pipe. Opacatu mbahe peyapo vahe peyapo ‘tomboetei ava yuvireco Tûpa yande Yar Jesucristo rembiapo pipe sui’ pe hesa pipe. Esepia, chupendar ité imboeteisa iyavei imborerecuasa. ãgüe tehi apirñhi vaheñã ité.

#### **Yemombaraisusa Cristo reroyasar yande recosa pipe**

<sup>12</sup>Che rivireta, che rembiaisu, ndapeyesapiha ucai chira, acoi oimese mbahe-mbahe tñi yande recoãhasa pñu ‘ndoyavii, ndipoi chietera evocoi nungar mbahe cheu viña’ pe hesa pipe. <sup>13</sup>Yayembovihareteñora rumo ipipe. Esepia, yande rereco yande Yar yemombaraisu agñer nungar pipe yuvireco. Evocoiyase yayemboviharete itera acoi yande Yar oyevisẽ güeco pñratasa pipe. <sup>14</sup>Iñehe marase yuvireco pñu Cristo reroyasar pe recosa rese, sovasapñi peico. Esepia, Tûpa Espñritu güeco porañetesa pipe secoi eté pe rese. <sup>15</sup>Acoi pe pñhu pendar omombaraisuse yuvireco, ndahei chira rumo iporapichisa rese, ndahei chiaveira imondasa sui, que mbahe tñi aposa rese. Ndahei chiaveira que ambuae ava mbahe rese iñemañeco tñisa sui ãgüe ehira serecosa. <sup>16</sup>Co rumo acoi peparaisuse Cristo reroyasar pe recosa pipe, ndapechĩ chietera. Pesapuacaira rumo Tûpa upe imboeteisa pipe serer pereco vahe rese.

<sup>17</sup>Esepia, oyepota ité ari Jesús reroyasar upe rane ité tecocuer rese porandu ãgua. ãgüe ehise yandeu, mbahe tñi catu itera Jesús reroyasarñhi upe. <sup>18</sup>Yavaise seco catupri vahe upe iñepisiro ãgua, ¿mara ehira piha ava ndaseco pñrai vahe ava angaipa viyar yuvirecoi vahe upe? <sup>19</sup>Sese peyemomborarase Tûpa remimbotar rupi, iyacatu peguataño itera mbahe aviye vahe pipe. Iyavei peyemondo itera yande Aposar upe ahe pe hã rãro ãgua. Esepia, ahe niha yeroyasa ité secoi.



### Aracuasa Jesús reroyasar upe

**5** <sup>1</sup>Che amboaracua pota pe pãhu pendar Jesús reroyasar rãrosar. Inungar avei niha che aico iyavei asepia vahe ité yande Yar mombaraisu agüer. Inungar ahe vireco teco orisa, ãgüe ahe aveira acoi yande Yar oyevise curi. <sup>2</sup>Pesãro tupri catu Tüpa upendar ava eta pe remiaro co omondo vahe pëu inungar ovesa rese yangarecuar osãro tupri vahe ovesa; peyapora pe querëhisa pipe ité. Ahe niha Tüpa oipota, ndahei ambuae yande cuaisa pipe tãi, ndahei avei guarepochi pota raisave yayapo. Yayapora rumo mboraviqui yande querëhisa pipe ité. <sup>3</sup>Ndapeicoi chira pe remiaro upe inungar que mborerecuar güeco ivatesa pipe oporocuai pĩrata vahe. Pemboyecuaru rumo pe recocuer aviye vahe chupe imbohesa tupri pipe. <sup>4</sup>Evocoiyase acoi oyevise yande Yar, yande rãrosar ivate catu vahe, ahese peipisira mbahe porerecosa, teco ori porañete apirëhi vahe.

<sup>5</sup>Iyavei no pe mbia chĩhivahe, pemboyeroyara ava pe rãrosar peico. Iyavei opacatu peyemboyeroyara pe reco mbegüesa pipe peyeupe peico. Esepia,

“Tüpa ava oyecomboivate ai vahe amotarëhimbar secoi; ava seco mbegüemi vahe upe rumo ombou oporovasasa” ehi.

<sup>6</sup>Peyecomombegüe catu peico Tüpa pĩratasa povrive. Evocoiyase pe reco mboivatera curi. <sup>7</sup>Opacatu mbahe rese pe pihañemoñeta atisa pemombehura Tüpa upe. Esepia, ahe pe rãrosar ité secoi.

<sup>8</sup>Pearacua cañii rene peyesui, pemahemoha ari rupi peyese. Esepia, pe amotarëhimbar Carugar pe reco momara pota yepi inungar yaguar oñaro vahe oguata tãi oporoeca ‘tamomara ava’ oyapave. <sup>9</sup>Sese peyemoviracuara Tüpa rese pe yeroyasa pipe Carugar upe. Esepia, peicua niha opacatu rupi avei yande rivireta Tüpa rese yuvirecoi vahe iparaisu co nungar mbahe pipe. <sup>10</sup>Peparaisumi pare rumo, Tüpa teieté pe reco mohivi tuprira, iyavei pe reco moviracuara, pe momirata aveira pe yepipi iriëhi ãgua ichui. Ahe niha oporovasasa pipe yande poravo oyeupe nara, yande yaso vaherã supi teco ori ndopai vahesave yande Yar rese yande recosa pipe. <sup>11</sup>Ëgüe tehi tasecoi güeco pĩratasa apirëhi vahe pipe.

### Mahenduhasa ipa vahe

<sup>12</sup>Yande rivri Silvano omboaviye tupri vahe ité ocuaita yepi, ahe che pĩtiviisa pipe co ayapo imondo che rembicuachía ndipucuimi

vahe pe mboaracua catu ãgua ‘ipipe toicua tupri catu yuvireco co porovasasa oipisi vahe, supi eté omboyecua vahe Tũpa poroaisusa’ che hesave. iPeyemoviracua tupri ité sese!

<sup>13</sup>Iyavei Babilonia pendar Jesús reroyasar yuvirecoi vahe oyoya vahe pe rese iporavopri, ahe ombou omahenduhasa yuvireco pẽu. Marcos, che rahir nungar avei imahenduha pe rese. <sup>14</sup>Peyeovaupite “avirave” apo pe yeaisusa pipe.

Tapereco tecocuer tupri yande Yar Jesucristo rese peico vahe. Aipo rupive.